



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 3

Priyanshu Rajawat-i Orleans Masters kokogo

Jaishankar-i Uganda aser Mozambique semdangtsü



VOL. XX NO. 177 (ADOK 177) DIMAPUR TENTONÜ (MONDAY)

RONGCHII (APRIL) 10, 2023

₹ 5.00

Nisung 5,357 dak Covid-19 putet; 11 asü

New Delhi, April 9, 2023 (Agencies): Deobarnep 8:00 ako tashi tesüiba ghonda 24 tsungda nisung 5,357 dak Covid-19 putet aser parnok zungsema nisung 32,814 anepaludar ta Health Ministry-i metetdaksü.

Maneni, tesüiba ghonda 24 tsungda nisung 11 asüba zungsema tasür ajak agi 5,30,965 kümogo. Honibarnü India nung nisung 6,155 dak COVID-19 putet aser nisung 11 asü.

India tesem balala nung Covid-19 kanga putetba agi Union health minister Mansukh Mandaviya-i online ajanga state health minister tem den senden ka amen.

Minister Mandaviya-i April 10 aser 11 anogotem mock drills agitsü tetuyuba agütsü.

Covid wara pezübuba süitsü asü ta osangbeneri asungdang Union health minister Mandaviya-i 'kümüma alitsü nungdak' ta langzü.

"Tesüiba Covid ji Omicron indang BF.7 sub-variant liasü aser tang XBB1.16 sub-variant menateper. Ministry ajanga

ajangshia aruba nung sub-variants dak lendong balaka maliba ajiteta lir" ta paisa metetdaksü.

Haryana sorkari public tesem ajak aser school nung face masks agitsü tetuyuba agütsüogo. Kerala nunga mashisa tetsürtem, taintem aser tashidak aketer ajaki mask enoktsü tetuyuba agütsü.

Arishi küm 60 ser temapur aser diabetes amala lifestyle diseases aketer teimba Covid ajanga asür ta Kerala Health Minister-i ashi.

Puducherry sorkaria public tesem ajak nung mask enoktsü tetuyuba agütsüogo.

Uttar Pradesh sorkari 'high-priority' directive ka agütsü aser iba ya ketdangsurtemi airports nung international passengers screen asütsüba lir. Covid putetba sample ajak genome sequencing atema yoktsüla ta sorkarisa metetdaksü.

Maneni, Delhi health department-i hospitals, polyclinics aser dispensaries ajak nung tendangtsü tetuyuba agütsüogo.

PM Modi-i Assam nung medical college 3 lapoktsütsü

Guwahati, April 9, 2023 (Agencies): Prime Minister Narendra Modi-i April 14, 2023 nü Assam nung medical college tasen 3 lapoktsütsü aser iba kasa mapang paisa All India Institute of Medical Sciences (AIIMS) Guwahati atema lung azungtsütsü.

Tawa tu National Medical Commission (NMC) ajanga Nalbari, Nagaon aser Kokrajhar nung medical college asem nung 2023-24 academic session nungi MBBS courses agitsü temelaba agütsü.

Tan ita tetenzüklen NMC-i Nalbari Medical College nem temelaba agütsüba sülen Assam nung government sector kübok MBBS menden 1,500 kümogo aser iba ya medical college 12 nung lir.

PM Modi-isa Ayushman Assam tenzüktsütsü aser iba ajanga ration cards agütsür kibongtem nem 5 lakh health

insurance agütsütsü.

April 14 nü pai 1 crore 10 lakh cards agüja iba maparen tenzüktsütsü. Ayushman cards ya kibong lakh 27 nem agütsütsü.

PM Modi-isa AIIMS Guwahati nungi health sector dak sendakba maparen aika lapoktsütsü.

Paisa Assam Petro-Chemicals Limited (APL) indang methanol plant lapoktsütsü aser Brahmaputra temdanga Sualkuchi-Palasar Bari Bridge yanglutsü lung azungtsütsü.

Sarasajai stadium nung PM Modi-i Rang Ghar beautification project aser Brahmaputra temdanga yangluba apu ka lapoktsütsü. Iba apu ajanga Palasar Bari den Sualkuchi sendakteptsü.

April 14, 2023 nü Sarasajai stadium nung Prime Minister Narendra Modi lia Bihu tsüngsanger 11,000 shi kati tsüngsanger.

Mizoram nungi Ngopa-i National Panchayat Award angu

Aizawl, April 9, 2023 (Agencies): Mizoram kübok Saitual district nung Ngopa yimtsüngi National Panchayat Award agizükogo.

Mizoram nung iba ama sempet tulu anguba yimtsüng mezungbubaji Ngopa lir ta ketdangsur kati ashi.

Union Ministry of Panchayati Raj-i sangdongba National Panchayat Award 2023 nung Karnataka kübok Mullusoge sülen Mizoram kübok Ngopa (village council) tanabuba jenjang takok angu. Iba ya Nanaji Deshmukh Sarvottam Panchayat Satat Vikar Puraskar (NDSPPSVP) category kübok lir.

LSGD themes 9 asadanga nung Ngopa yimtsüng ajanga best

performing gram panchayat tanabuba sempet angu.

Nanaji Deshmukh Sarvottam Panchayat Satat Vikar Puraskar category kübok mezungbuba jenjang angur nem Rs 1.5 crore, tanabuba nem Rs 1.25 crore aser tasembuba nem Rs 1 crore senpettem agütsü.

April 17, 2023 nü Delhi nung National Conference on Incentivization of Panchayats cum Award Ceremony alidang panchayat mesüra village councils nem sempet lema agütsütsü.

Ngopa yimtsüng ya Aizawl nungi kilometre 182 pilar Manipur arrtsü anasa lir. Iba yimtsüng nung kibong 1,000 shi ka lir aser nütüng yongsük 4,600 lir.

Nagaland nung Yisu Khrista shia aruba benjung among



Kohima, April 9, 2023 (TYO): Yisu Khrista tasü nungi shia aruba- Easter benjung Nagaland nung kanga longsoa mongogo.

Iba anogo dang Resurrection Sunday ta-a ajar aser Kohima nung tamangertem Naga Solidarity Park nung adenshir Sunrise Service nung shilem agia liasü.

Iba sentong ya Kohima Baptist Pastors' Fellowship (KBPF) ajanga ayongzük aser tesentepertemi 'Christ the Lord is Rise today' aser 'Christ Arose' kentem tena benjungtep.

Sentong nung o jembirji KBPF general secretary aser Khedi Baptist Church Kohima Pastor Dr Ruokuovilie Sachü liasü aser pai "Yisu Khrista tasü nungi shia aruba ya takok anguba mapang ka lir kechiyong Kangkidong kübok temenen samatsü" ta ashi.

"Paisa tesentepertem dang pei pei taküm nung shia aruba tetezük chichia angateta amangtsü aser taküm melenshir alitsü ayongzük.

Meimchirtem temenen nungi alangzüktsü asoshi Yisu Kangki nung asü aser tasü nungi shia aru. Naga nunger Yisu dangi meiytsü mapang tongogo aser Pa temeim nung akangakanga noktaksüla" ta Dr

Sachü-i ashi.

"Christianity ya Tsüngrem Kotak nung aliba indang masü saka pei temulungjang nung Tsüngrem lidaktsüba lir. Yisu messiah ama shia aru aser iba ajanga asenok taküm nung teimla aser taidok agütsür" ta paisa ashi.

"Shia aruba ajanga Tsüngremi meimchirtem temenen nungi kümzükba atalok" ta Nagaland Baptist Church Council general secretary Rev. Dr. Zelho Keyho-ia ashi.

Yisu shia aruba ajanga meimchirtem taküm kümzüktsü aser teti tatem makaba taküm alitsü agütsür, ta paisa ashi.

Iba Sunrise Service nung mendenji Kohima Phom Baptist Church pastor Rev. Phom Lee Van liasü, Sumi Baptist Church Daklane pastor Khekavi Yeptho-i temoatsü meshia sarasadem aser Chang Baptist Church pastor Anung Chang o New Capital Baptist Church pastor Bendangtemtsü nati lai azüng.

Maneni Chakhesang Baptist Church Minister's Hill aser Konyak Baptist Church chor temi ken aten aser Meitei Baptist Church pastor Jonathan-i tenüngsang agüja sarasadem.

"Yisu Khrista shia aruba ya taochi, temeim, yimjung, mapa

tajung aser taküm ajanga tamajung tebilemba, tashiyim, azütokshi aser tasüba madak takok anguba lir" ta Nagaland Governor La. Ganesan-ia metetdaksü.

"Asenoki Easter nung takok anguba atema benjungtep dang tesem ajungalen timtem ajuruba nübertem nem teimla agütsüdi. Temenen samatsü, ochi nembangaa mayutsü aser tatem nungbo tajung aser ochi agi takok angutsü osang sangoktsüdi" ta paisa ashi.

"Yisu Khrista indang taküm aser tesayubatem, asüba aser shia aruba ya ajemaluba, tila akümba, bendanga agütsüba aser temeim indang tansütsütem lir" ta Governor Ganesan-isa ashi.

"Easter sayatenya ajanga nisung ajak nem temeim, yimjung aser teimla agüjangma" ta Chief Minister Neiphiu Rio-ia metetdaksü.

"Khrista shia aruba ajanga tepela ya nisung ajak mulungjang süngdakjang aser Pa anangwa agi asenok tamang len aniangma" ta Deputy Chief Minister aser BJP lenir Yanthungo Patton-ia ashi.

Nagaland kübok tesem ajungalen arogo balala nung Easter tekülem sentongtem ayongzükaga agiogo.

Dimapur nung kitsükkirong lendong atalok; 1 rongset



Dimapur, April 9, 2023 (TYO): Deobarnü Dimapur kübok East block, Burma camp nung kitsükkirong lendong tulu ka atalokdang arishi küm 85 tain tantsür ka rongset aser iba lendong ajanga kilen 260 shi takoksa ajuruogo.

Deobar anepdang 11:30 ako meta mi lendongji atalok ta osang angazüker.

Fire station ketdangsur kati ashiba agi fire personnel ka gas

cylinder apokdang yiru.

Iba lendong azioktsü atema Central, Chumukedima aser Dimapur Fire station tem nungi mi enseperitem arua ghonda asem shi agia miji ensep, ta ketdangsurisa ashi.

2011 nung iba kasa tesem nung kitsükkirong lendong ka atalokdang nisung 3 taküm sama aser kibong 800 shi takoksa ajurua liasü.

"Deputy Commissioner

menden ser District Disaster Management Dimapur ajanga takoksa ajuruba kibongtem nem chiyungtsü aser parnok anenzükdak agütsüogo" ta EAC Dimapur Yan Kikon-i ashi.

Nisung aikati lendong nung takoksa ajururtem nem chiyungtsü aser tzü agüja yaritepogo. Iba lendong nung Rs 1 crore shi akoksar asütsü ta asadangtetogo ta paisa metetdaksü.

Assam CM Himanta-i Rahul Gandhi anema ken o benoktsü



Rahul Gandhi & Himanta Biswa Sarma.

Guwahati, Rongchii/April 09 (Agencies): Congress lenir Rahul Gandhi-i 'Adani' tweet ka asüba dak sendakba nung Assam Chief Minister Himanta Biswa Sarma-i tenüing menüksüba ken o ka benoktsü. Iba osang ya CM Sarma-i Deobarnü (April 9) jangjatsü. Tweet ka nung telangzüba agüja Assam CM-i Congress lenir Rahul Gandhi dang "...asenok okadak ajuruteptsü," ta shia liasü.

Rahul Gandhi-i billionaire Gautam Adani tenüing amshia tweet ka asüba nung Sarma-i iba telangzüba ya agüja liasü. Bofors aser National Herald ochimashi ken o nung Rahul Gandhi dang kecha masüngdangba ya BJP-i yimya tajung sayuba lir, ta Assam CM-i shia liasü. "Bofors aser National Herald scams nung nai (Rahul Gandhi) mapa tamajung inyakba miima ayu asü mayu

ta onoki masüngdangba ya yimya awashi ajungba agi lir," ta Sarma-i shia liasü. "Aser nai (Rahul Gandhi) komasür Ottavio Quattrocchi ya aiben Indian justice nungi jenbudaktsü," ta pai ashi. Rahul Gandhi-i Honibarnü asendenshi Adani Group dak tai tonglokja liasü aser Congress lenirtem BJP dangi meyipba ya meinprongtsü atema dang lir ta shia liasü. "Parnoki ochi miimbanga ayur, anungji parnoki anogoshi mashi leni anir! Tasüngdangba kasa dang lir - Adani indang company nung tenüing miimshia ali kimong sen crore 20,000 agi aliba ya shiba?" ta Rahul Gandhi-i Twitter nung graphics ka nung Adani tenüing züluba nung Congress nungi meyiper nisung pongu den Himanta Biswa Sarma tenüing densema liasü.

COVID-19 den raratsü Assam renema lir: Health Minister

Guwahati, Rongchii/April 09 (Agencies): COVID-19 agi tanaben kongshira, aji azüoktsü Assam renema lir, ta State Health Minister Keshab Mahanta-i Honibarnü ashi. Union Minister Mansukh Mandaviya den virtual yimya nung senden ka amenba sülen pai iba o ya ashi. Linük nung COVID-19 cases tali akumba ajanga state ajunga indang health minister tem den Honibarnü Union Minister Mandaviya-i video conference ajanga senden ka ayongzüka mena liasü. Mandaviya-i parnok dang iba tashidak ketdangsütsü asoshi saksalema aser kumdanga alitsü ashi. Iba senden sülen osangbener den jembidang Assam Health Minister-i ashiba agi, "Delhi, Kerala aser Maharashtra amala state tem nung COVID cases

tali putetba osang lir. Taoba mapang ajangshiba nung ajemdaker state balala nung coronavirus prokshia aoba yimyatam indang jembia liasü." "State ajak dang tensa kanga junga repranga alitsü shiogo. COVID-19 agi tanaben kongshira, tensa azüoktsü Assam renema lir. Taoba ita asem tsüngta state nung COVID positive cases ana dang liasü. Parnok home isolation nung ayu aser anogo asem-pezü tsüngta taneptsü angu. Jelja nüngdakba mera tem agiogo," ta pai ashi. "Tsübotsü menüngdak saka asenok saksalema alitsüla," ta paisa ashi. Osang ajanga ashiba agi, tesüiba ghonda 24 tsüngta India nung COVID-19 cases tasen 6,050 liasü aser Hokulbarnü active cases 28,303 liasü.

Mokokchung nung painting competition alitsü

Dimapur, Rongchii/April 09 (TYO): Creative Hearts ajanga Art Club Jubilee Memorial College den lungjemer April 15, 2023 nü World Art Day nüngtem nung painting competition, art exhibition and sale sentong ka Mokokchung nung ayongzüka agitsü. Iba tetoktepba ya artists category asem atema asütsü: Category I - Class 5 nungi Class 8 tashi, Category II - Class 9 nungi Class 12 tashi aser Category III ya Open Category (College students aser arishi küm 19 aser

temapur atema) alitsü. Iba tetoktepba nung temaba jenjang asem nung takok angur nem senpet den kulizüing kaket agütsütsü. Takok angur indang artworks ya exhibition nung sayutsü. Category I aser II nung takok angurtem ya June, 2023 nung agitsü sentong yanglua aliba Creative Hearts Summer Art Camp nung admission angati agütsütsü. Iba sentong ayongzüker rongnung züngsem Alongdi Longchar ajanga sangdong ka nung ashiba agi, "Painting

tetoktepba nung sempet alirtemi pei sempet sayutsü bushir. Iba tetoktepba ya "The Beauty of Nature" omen nung ajemdaker alitsü, kong ali nungi tzüyim tashi aser tetsüngta nung aliba ajanga alima takzüba aginer." Iba tetoktepba nung shilem agitsü asoshi tejangrar temi April 12, 2023 tashinung mobile number 8732082077 mesüra Instagram nung @creativehearts_2023mesüra creativehearts173@gmail.com nung email süa tenüing zülüoktsü akok.



Arunachal Pradesh nung aliba Police Training Centre (PTC), Banderdewa nem 2021-22 küm atema "Union Home Minister's Trophy for Best Training Institution" agütsüogo. Northeast region nungi Zonal category nung Non-Gazetted Officers Training Institute group kübok iba sempet ya Arunachal Pradesh nung aliba PTC-Banderdewa nem agüja liasü.

Assam Rifles temi sentong balala ayongzüka agi



Dimapur, Rongchii/April 09 (TYO): "Sentinels of North East" tanüla nung tali tashi itshitsü nükjidong nung HQ Inspector General Assam Rifles (North) kübok Assam Rifles Battalion ajanga Azadi ka Amrit Mahotsav kübok India nunger puti otsü indang quiz tetoktepba Tuensang nung alidang shilem agia liasü. Iba tetoktepba nung nisung 167 arua tejangraba tulu nung shilem agia liasü. Assam Rifles ajanga April 8, 2023 nü Mon district kübok Wangti yimdak security meeting ka ayongzüka liasü. Senden nung security tensa

indang nüburtem den jembia liasü. Iba senden nung GBs, Village Council aser Nagaland Village Guard tem dena liasü. Yangji aliba nüburtemia region nung tensa junga lidaktsütsü asoshi akokba lenmang nung yariteptsü aser amalitep akatsü ashi. Maneni Assam Rifles temi Thilixu village, Dimapur nung GBs aser village council chairman nungertem den senden ka April 8, 2023 nü mena liasü. Iba senden nung tang tensa indang jembishinüa liasü aser yimdaklir tem yimya balala nungi Armed Forces nung

adentsü indang angazükdaktsü aser tejangrar candidate nem Battalion ajanga teyari agütsüba indanga metetdakja liasü. Security forces temi Civic Action Program balala agiba indanga parnoki nüburtem nem metetdaktsü aser yimtsüing nung alirtem ajanzüktsü asoshi terenlok mapa tem inyaktsü nüngdakba osang agüjang, ta parnoki ashi. Iba ama sentong tajung ayongzüka atema nüburtemi Assam Rifles tem dang pelaba lemsatep aser tarutsü nunga tesendaktep tajung nung alitsü asoshi amalitep akatsü jembia liasü.

KIA/KIO ajanga Kuki telungpur indang nok-nü auya

Imphal, Rongchii/April 09 (Agencies): Kuki Independent Army/Kuki Independent Organisation (KIA/KIO) telok nungi südi ta temolung melemteti aliba nisung kari Manipur nung suspension of operations (SoO) kübok telungpur telok balala indang nok-nü yua aliba tesem amak aser auya. Churachandpur nung SoO kübok telungpur telok balala indang designated camp nungi KIA/KIO züngsem temi hadir tajung 25 shi ayua. Manipur nung aliba Kuli rebel outfit - KIA/KIO ya sorkar den zülutepba tripartite ceasefire pact "Suspension of Operations" (SoO) nung maden. Iba inyakyim ta April 9, 2023 anepdang ataloka liasü. Manipur nung ketdangsür temi ashiba agi, KIA/KIO telungpur telok tuluka arua Myanmar den arütsüa aliba Churachandpur district kübok Henglep sub-division kübok Chungkhao designed camp ya sapang. Churachandpur district nung Chungkhao designate camp nungya Kuki kin indang telungpur telok balala nungi

Kuki telungpur 25 shi alir, koba Centre aser Manipur sorkar den SoO kübok lir. KIA/KIO züngsemtem aser parnoki rakzükraktemba nok-nü ya bener azüdokshi melie jena ao. Arishi küm 40 tain KIA/KIO lenir Thangkhongam Haokip alias Davidson alias Pareng Kom aputsü asoshi osang agütsür nem sen 50,000 senpet agütsütsü ta Manipur police-i sangdonger asemnü dang lir SoO camp nungi nok-nü ayua bener aoba ya ataloker. Manipur nung Churachandpur district kübok aliba SoS designated camp nungya United Socialist Revolutionary Army (USRA), Kuki National Front (KNF), United Tribal Liberation Army (UTLA) aser Kuki National Front (Zougam)/KNF-Z telungpur alir. Item hadir ngutettsü asoshi 'red alert' ka agütsüogo aser iba dak sendakba nung ken o ka zülüokogo, ta osang ajanga ashir. Myanmar aser Mizoram den arütsüa aliba Churachandpur district nungya arem min tulu lir, kong Kuki-Chin-Mizo telungpur telok balala lir.

Easter Sunday nü Ato kilonser, Modi-i Tenla ki ka semdang



New Delhi, April 09, 2023: Easter anogo nung Ato kilonser, Narendra Modi-i Delhi nung aliba Sacred Heart Tenla ki semdangba mapang tangokba noksa nung angur.

New Delhi, April 09 (Agencies): Easter Sunday anogomong nung Ato kilonser, Narendra Modi-i Delhi nung aliba Sacred Heart Arogo Tenla ki semdang. Tenla kidang Ato kilonser Modi-i putirtem aser tamangertem den salem lemsatper aser sarasadem nunga

shilem agia liasü. Khristan nütsung aika aliba mesüra teimba aliba state tem-Goa aser northeast state ana nung BJP-i takok nguogo aser ibaji ajanga Khristan aikati party den sendaktepba temaitsü angur. Amongnü anepdang Modi-i twitter ajanga, "Tepela Easter!

Iba ama anogomong ajanga asen loktiliba nung tesünep tanela adokdakjang. Iba anogomong ajanga loktiliba tenzüksü aser tashimaitertem nem tashi agütsütsü atema nüburttem ajungmesoang. Iba anogo nung asenoki Kibur Khrista tesayubatem bilemteter," ta lemsatapa liasü.

India nung nisung 5,357 dak covid putet; teshirangdakpur 32,814 kümogo

New Delhi, April 09 (Agencies): Tesüiba ghonda 24 tsüingda India nung ano nisung 5,357 dak coronavirus putetogo aser ibaji densemabo tang linük nung coronavirus agi teshirangdakpur 32,814 kümogo, ta Amongnü Union Health Ministry-i metetdaksü. Tesüiba ghonda 24 tsüingda coronavirus agi shiranger 11

süogo aser ibaji densemabo tang tashi nung linük nung iba tashidak agi shiranger 5,30,965 süogo. Gujarat nung nisung asem asü, Himachal Pradesh nung ana asü aser Bihar, Chhattisgarh, Maharashtra, Odisha, Uttar Pradesh aser Kerala nunga nisung kaka süogo.

Tang tashi nung linük nung nisung crore 4.47 (4,47,56,616) dak coronavirus putetogo aser tang teshirangdakpurtemji shilem 0.07 dang lir. Linük nung iba tashidak agi shiranger ajak senteper 4,41,92,837 anepogo aser iba tashidak agi asürtem shilemji 1.19 dang lir, ta Health Ministry-i metetdaksü.

Jaishankar-i Uganda aser Mozambique semdangtsü

New Delhi, April 09 (Agencies): External Affairs Minister, S Jaishankar-i Hombar nungi tenzuka anogo troknü tsüingda Uganda aser Mozambique na semdangtsü, aser iba mapang nungji linük ana den tesendaktep tajungba akümtsü atema jembitsü. Ministry of External Affairs (MEA)-i sangdong ka ajanga, "External affairs minister-i April

10-12 anogotem nung Uganda semdangtsü. Iba mapang nungji pai Uganda Foreign Minister, General Jeje Odongo leniba nung ketdangsertem den senden amentsü," ta metetdaksü. MEA-isa, Jaishankar-i April 13-15 anogotem nung Mozambique semdangtsü; India external affairs minister kati Mozambique semdangbaji tang mezüing asütsü, ta metetdaksü.

Pai iba linük nungi tongti ketdangsertem den senden amentsü aser Mozambican Foreign Minister, Veronica Macamo tena leniba nung 5buba Joint Commission Meeting amentsü. Jaishankar-isa minister tem aser Assembly of Mozambique nungi züingsemtem aika ajurutsü aser iba linük nungji aliba India nungertem den-a jembitsü.



April 09, 2023 nü Easter Sunday anogomong nung anepdang züingda Andhra Pradesh nung aliba leper ka nung Khristantemi sarasademba mapang tangokba noksa nung angur. Andhra Pradesh nung aliba district aika nung Khristantemi küm shia Easter anogo nung leper nung sarasadem.

PUBLIC NOTICE
ICICI Bank Registered office: Landmark, Race Course Circle, Vadodra 390 007. Corporate office: ICICI Bank Towers, Bandra-Kurla Complex, Mumbai 400 051.
HON E-AUCTION ASÜBA DEN INVITATION NOTICE
 Tsüinglanglen shia aliba sen apurtem dang hon osettem atema sentsüh agüjang ta metetdakja liasü. Pamoki ICICI Bank Limited ("ICICI Bank") dang nungi agiba "Facility". Pamoki sentsüh magusüet nungji April 20, 2023 nü onoki hon agi yangluba osettemji E-Auction asütsüsa akümer. Osang jelia memetdaksü Account agientsü/E-Auction anogo melenshütsü atema ICICI Bank dak tashi lir. Auction j online ajanga -<https://jewel-auction.procuretiger.com> nung nungongdang 12:20 ako nungi nungongdang 3:30 tashi nung agitsü. Osangtsüsang tejangja metetpelatsü atema agüja aliba website nungji log in süang. Sen apur süadokerlira telatetba ajakite senmanger den asütsü.

Loan A/C No.	Customer Name
Branch Name: Dimapur	
047605000658	Diwanath Prasad

Date : 10.04.2023
Place : Dimapur
S/d Authorised Officer For ICICI Bank Limited

Ukraine Dy. Foreign Minister-i anogo pezünü India semdang

New Delhi, April 09 (Agencies): Ukraine first deputy foreign minister, Emine Dzhaparova-i April 9 nungi April 12 tashi India semdang; iba mapang nungji par linük nung rara aliba dak sendakba onüktem jembitsü. Yaküm February ita nungi tenzuka Russia-i Ukraine amak tenzükba sülen tang mezüing Ukraine nungi tongti ketdangser kati India

Minister-i Ato kilonser, Narendra Modi Kyiv-i jaoktsüa akok aser September ita nung G20 summit nung o jembitsü atema Ukraine Tir, Volodymyr Zelenskyy jaokang ta mepishitsüa akok. Dzhaparova-i Secretary (West), MEA, Sanjay Verma den-a senden mena linük ana tsüingda tesendaktep onüktem nung o lemteptsü.

Temperature 3-5 Degree Celsius agi teimba akümtsü: IMD

New Delhi, Rongchii/April 09 (Agencies): Amongnü India Meteorological Department (IMD)-i, taruba hopta linük tesem tulubaka nung maximum temperature 3-5 degrees Celsius agi teimba akümtsü, ta metetdaksü. Ajisüaka iba mapang nungji linük tesem kecha nunga 'heatwave' malitsü, ta IMD-i metetdaksü. Kasa mapang nungji

Northeast India aser anüolen Himalayan region nungbo normal temperatures alitsü, ta IMD-isa metetdaksü. IMD-i nüburttem dang tsüingpert aser yipru lendong nungi kümzuka alitsü atema tekümdangtsü metetdaksüba den külemi mapang shia tsüingsang-mopung dak sendakba osangtsüsang metetpelaa alitsü metetdaksüogo.

India nung keyi 3,167 lir: PM Modi

Bengaluru, April 09 (Agencies): Amongnü Ato kilonser Narendra Modi-i, 2018 küm linük nung keyi 2,967 liasü saka keyi nütsüing teimba renloka 2022 küm keyi 3,167 aküm, ta metetdaksü. Karnataka kübok Mysuru yimti nung 'Status of Tigers, India 2022' report sayaba sentong nung Modi-i küm 50 tsüingda Project Tiger takok anguba atema nüma-tanga pelaba lemsatper. Ato kilonseri, süngdonglidong aser arem shiruru wazüka ayubaji India nunger sobaliba shilem ka lir; yamaji India-i international jenjang nung arem shiruru wazüka ayuba tsütsü alizüing aika tongtetogo, ta metetdaksü. "Tanü alima nung keyi teimba aliba linükji India lir.

Linük nung shiti-a 30,000 shi lir aser India nung Asiatic shiti aika lir. Iba denji kasa India nung tezü ka dang keta aliba kendok 3,000 shi lir. Asiatic molusongzü teimba aliba linükji India lir; 2015 küm iba molusongzü 525 aliba nungi 2015 küm nungbo 675 aküm. Tesüiba küm pezü tsüingda merok keyi-a shilem 60 agi teimba kümogo," ta pai metetdaksü. Ato kilonseri, "Project Tiger takok anguba ya India kija atema takok masü saka alima atema takok lir. Iba Project ajanga India-i keyi kümzükba dang masü saka parnok taküm alitsü atema tesem tajung agütsüogo. Linük nüchiso ngur küm 75 amongba den külemi alima nung keyi shilem 75 bo India nung lir," ta paisa metetdaksü.

MUDRA loan sen 50,000 agi kechi business inyaktettsü?: Chidambaram

New Delhi, April 09 (Agencies): Pradhan Mantri MUDRA Yojana küm 8 ajungba mapang Amongnü Congress lenir, P Chidambaram-i, iba scheme kübok loan shilem 83 bo sen 50,000 tekübok lir; tanü putu nung iba sen jagi koba ama business inyaktettsü?, ta asüingdang. PMMY scheme ya 2015 küm April 8 nü Ato kilonser, Narendra Modi-i tenzükja liasü, aser iba scheme kübok business inyaktetsü atema loan lakh 10

tashi agütsür. Chidambaram-i twitter ajanga, Mudra scheme kübok küm ti tsüingda loan 23.2 lakh crore agütsüogo, ajisüaka loan shilem 83 bo sen 50,000 tekübok lir, ta ashi. "Iba tetezü sen crore 19,25,600 loan bo sen 50,000 mesüra iba dang nungjagi tajemba agütsüogo. Tanü putu nung sen 50,000 jagi kechi bushiness inyaktettsü, ta ni süngmanger," ta taoba mapang Union finance minister, Chidambaram-i ashi.



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 10, 2023

Aor Officer-tem telongjem

Nagaland nung government office balala nung inyaker Aor ketdangser (officer)-temi parnok longjema alitsü nungdak ta angateta Kohima, Mokochung aser Dimapur nung telongjem tentetba ajanga parnok masü saka nübortem ajangzüksü imlar. Aor officer-tem tetezü government nung ketdangsuba mapa tapu balala inyaker kibong ka chirtem lir, anungji parnok tsüngda shisalemsateptsü, ajungshiteptsü, arütsüteptsü, yariteptsü aser junga inyaknubo tenüng sangteptsüa nungdak adoktsü. Atangji, Nagaland nung lokti tentet zünger mezüngma onsara, anungji tebelemer kabo lokti mapa nung kanga belemer aser lokti meimba nisungtembo tenla agütsür magütsümar. Iba jagi karibo Nagaland dang ya lokti tentet lima ta-ka ajar. Ashiko, item loktitemji teimbaka tangar dak kisüng imlar aliba lokti asütsüa akok. Aji oda, taoba mapang asenok den iba yimobilem nung lemsatepba amato lokti karbo moatsü aser tsüngremmanga tangar dang nungi tenla meshia amongba lokti tentetema lir. Ajisüaka, officer-tem telongjem yabo tangar nem timtem agütsüba aser lokti tenüng amer meshimetsüba telok ka masü saka government aser nübortem yariba telok lir. Government nung asenok Aor-tem balaka Tsüngremi moatsü nungji ketdangser aika lir, anungji khureta tuluba. Aji oda, Aor officer-tem jungra government tajung asütsü aser asenok officer-tem mejungra government-a majung asütsü ta asüba maongka aser khuret tulu tanü tashi asenoki bena lir. Nagaland nung Aortem ajak asoshi khuret tulutibaji Nagaland state akümba mapa nung ya Aortemi shilem tuluba agia lir, anungji Nagaland jungra Aor ajungba agi asütsü aser mejungra Aor majungba agi asütsü. Ibaji meteta kodang government tenzükdir, atangji Aor officer-tem rongnung shisalemsatepa ajungshiteptsübaji kanga nungdaker. Ao lima nung Aortem rongnung leptepsüngtepa aliba British aser America nungertemi anendaktsü ama, yashi tashi Nagaland anüdoklen leptepsüngtepa aliba anendaktsübaji Aor Tsüngrem tenzükertem, tesayurtem aser government nung ketdangsertemi tasü majem bendanga agüja inyakba ajanga lir. Aji oda, küm 60 jakdang alima tensa tia tamajung nung Nagaland anüdoklen inyaker government ketdangsertem tenüngtemji reprangdangra Aor—Aor dang asütsü. Aji oda, tanüa ilenji tenzüker government tenzükertemji Aor teimba asütsüa akok, kechiyong tangartemibo ilen jagi kangasa mouner. Akhidang Aor ketdangsertemi Nagaland anüdoklen tenzükbaji ali kimong aser rongsen penbuba agi masü saka item nübortem meimba ajanga liasü. Tanüa kasa temeim aser tangatetbaji asenok Aor officer-tem dak alitsü nünngdaker. Aji oda, Aor officertem-bo Dimapur aser Kohima nung alitsü rakteptsüba masü saka tanüa tangari matongdak aser mounüdak oagi nungdakba nübortem tenük lapokja yarir samanirtem asütsü tim. Yimten tenzüker süaka, Aor officer-tem yabo akhidang nungi lokti aser arogo tsütsüa arogo aser mungdang nung ita sen chia inyakerterem dang nungibo temulung tagütsüba agüja inyakerterem liasü. Aji oda, Aorbo government officer-temi dang Laishiba meyipba nunga shilem agi aser Ao mungdang nunga Laishirtem dang nungibo temulung tagütsüba agüja inyaka aru. Iba jagi Ao mungdang aser lokti tentet ajak akhümketketa zep ta tephung langer aoba mapang liasü. Aor government officer-temi party politics nung shilem magi aser election nunga pei vote agütsüba dak alaka nübortem tai menadaktsütsüa meinyak. Iba jagi Aor officer-tem tali mera aket aser government inyakyim ajak nung indangindanga inyaka otet. Itemji Aor officer-tem senmang lir. Aji oda, Ao officer-temi pei inyakdak junga inyakba agi alima tsüngdang officertemji kisüng masü Aor ajunga mera aketer aser tanüngba lanurtem mulung ajungshir. Iba tangatetba nung tanü putu nunga Aor officertem ya government nung shisalen teyur aser pei mapa nung tangar asoshi tatishitsü tajung küma inyaketba ketdangser asütsü tim. Aor officertem yagi nübortem tenzükbaba dang masü saka Aor MLA-tem shirnok koba telok nungi adoka lidir-liaka, parnok nem shisatsü tajung agüja yaritsübaji kanga tongtibang asütsü. Aji oda, tangar anema masü mesüra tim masüba mapa ka ozüng alema inyaktsüba nung masü saka Naga nung songjen ajungtsü atema shisa tajung lemsatepa inyaktsü atema Aor officer-tem aser Aor yimsüsürtem mapang mapang shia ajurutepa alitsübaji Nagaland asoshi kanga tenüngdaktsü aser tajangzük asütsü. Item nükjidongtemji temulung nung yur Aor officer-tem telongjem tenzükgoko ta angateter.

OLEMSABANG

" RONGSEN MASÜ TENÜNG TAJUNGANG SHIMDI "

~ L. Kika Pongener.

"Rongsen tulu dang nungi tenüng tajungang shimtetsüla. Hon aser taribi dang nungi maongka tajungba" (A.Shin-22:1). Rongsen tuluji...Hon, taribi, kimong-lumong, ki-o-jen, sen, tsük etc. itemji agütsü. Ano tenüng tajungji aika dang lir...Mapa tajung inyakba, yimden, arogo aser loktiliba tenzükbaba nung nuburi tamang katettsüsa, temulung lemtettsüsa, ketdangsua, ochishia inyakba dang tenüng tajung ta ashitsü akok. Senotsü teraka ajangzüksü mechi, tangari tetla-tetshitsüsa, mesüra tenüng menuktsüsa inyakdang nungibo, asen dak tangari tatishitsü tajung agitsüsa ochishia inyakba-ang tajungba. Pai/lai-bo pa/la nem nungloktsüba mapa ajak nung teti ochishia dang inyaker ako...ta tangari tenüng tajung agütsütsüsa inyakba-ang tajungba. Rongsen tulu aika anguba dang nungibo, Tsüngrem'er maongka tilaka anguba-ang kanga agia tajungba. Ano Tsüngrem o-i ashir, "Tenüng tajungji senti mozü dang tajungba" (Sayu-7:1) Senti mozüji...Turonem tajung adokdaktsüba mozü (Scent) aser taneptsü anguba mozü (Medicine) agütsü sudi. Item senti mozü dang nungi tenüng tajungang shimtsüla. Asen nem nungloktsüba mapa ajak nung tenüng tajung angutsüsa indangindanga, nendaknendaka, merukmeruka inyaktsüla. Yimden, arogo aser loktiliba mapa ajak nung, asen dak tangari temulung lemtettsüsa, tamang katettsüsa aser tatishitsü tajung agitsüsa ochishia inyaktsüla. Asen yangkü agüngtsüba indang mebilemi alima aser nubur ajungtsü bilema inyaktsüla. Na aser ni lokti nung teronem tajung adokdaktsür, lokti tashimait aliba aneptsür/yanlur agütsüla, saka lokti petsaperongdakja telemsa/teraksa adokdaktsür ka masütsüla.

Laishiba nung...Rongsen tulu, hon, taribi aser senti mozü dang nungia tenüng tajungang shimtsüla...ta zülua aliba ya, asen Aotsür Aor asoshi-a tangazüksü lesson tajung ka agütsü. Kechiyong tanü asen Aotsür Aor adenba/tenzükbaba loktiliba ajak nung ketdangsuba mapa reprangdangra, teimba ka ochimashi agi sunga lir. Talisa, Election nung tangar kintem dang nungi Aotsür Aori balaka sen nung tenuk kanga yoker, aser taaktsüka ochimashi mapa kanga inyakteper. Tesasatsüka, Aotsür Aor sorkar mapa nung tenzüker, loktiliba mapa balala nung tenzüker, yimden, arogo aser mungdang nung tenzüker, teimba kati tenüng tajung dang nungibo sen/rongsen temeimba lir. Yimden yimsüsüba nunga tenüng tajung nem masü sen/supokrem nem amokbangdaktsür, sorkar tenzükbaba nunga tenüng tajung nem masü sen/supokrem nem kokdaktsür, loktiliba tenzükbaba ajak nung sen/supokrem nem anidaktsür, mungdang/arogo tenzükertema sen/rongsen nung mettsüdaker. Tesasatsüka, tanü asen Aor arogo aika rongsen ketdangsuba mapa nung, nuburi temulung melemtettsüsa, mesüra tamang makatettsüsa ketdang agüba angur. Tesungmangtsüka, tanü asen lima nung yimden, arogo aser loktiliba meyong rongsen, pei nuja meyong rongsen amai kibur küma, temulung ulua, ochimashi ketdangsua amshiba angudang kanga sasaseta bilemer.

Tanü putu nung Khristan tamanger tajung aikati, Khristar arogo aser mungdang tenzükbaba aser Tsüngrem mapa nung tenzükbaji, tajangzük angulen mapa ka amai bilema tenzüker, aser ketdangsuba mapa inyaktsü nungloktsübaji sen aatsü lenmang tajung ka amai angatetba tenzüker/lennir aika lir. Tenyartem mapang nunga iba amaji aibelena sayuba tiyazü tesayur aser aibelena angateta amangertem karbo liagü sudi. Ibajagi Tenyar Pauli Tsüngrem tenzüker Timoti dangi züluba shiti nung yamai shia angur. "Tamajung, temulung malem, temulung memeruk, ochi maka nisungtem..... Parnoki Tsüngrem tsübubaji tajangzük angulen ta bilemer" (1Timoti-6:5)...ta zülua angur. Tanü asenok Khristan-tem rongnunga Khristar arogo aser mungdang nung tenzükbaji tajangzük angulen lenmang tajung ka amai angateta tenzükbaba, mesüra Khristar arogo aser mungdang mapa nung ketdangsuba shilem atabaji, sen aatsü/aayangtsü lenmang tajung ka amai angatetba tenzüker/lennir karbo lir. Atangji, tanü putu nung arogotem nung rongsen ketdangsuba mapa jungjunga reprangdangra, arogo teimba ka nung tenzüker/tenzükla aikati tajitettsü/tashishitsü keta ochimashi inyakba angur.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Francis-i Ukraine aser Russia nunger atema sarasademtsü



April 09, 2023 nü St Peter's Basilica, Vatican nung Easter Sunday tekülem sentong agidang tangokba noksa nung angur.

April 09, 2023: Amongnü St Peter's Basilica, Vatican nung Easter Sunday tekülem sentong nung Pope Francis-i Ukraine aser Russia nunger atema sarasademtsüba den külemi rara ajanga jenshir refugees jenokdaksüba linüktem dang pelaba lemsatap.

Arrshi küm 86, Pope Francis-isa alima nung timtem adoka aliba linüktem atema tebilemstü akaba lemsatap.

Nüburtem aser linüktem tsüingda temelung lemteptsü ajungshia Francis-i, "Easter ajanga tamang aser tejashi sangwatsür," ta ashi.

Yaküm February ita nung Russia-i Ukraine amak tenzükba sülen nungi Pope Francis-i mapang shia iba rara anentsü ayongzükba den külemi Ukraine nunger atema sarasademjang, ta mepishia aruogo.

"Ukraine nungertemi yimjung lenmang atema jajaba

mapang nung parnok den yaritepang aser Russia nunger den Easter tesangwa lemsatapang," ta pai ashi.

Pope Francis-i St Peter's Basilica kima sabang nung wheelchair ka nung mener jemi.

"Rara ajanga yirua alirtem aser mangyimer ajak nem tesünep agüjang aser tepuokdak alirtem pei kibongtem dangi meyipa arutsü ate, a lenmang lapokjang," ta pai sarasadem.

Paisa alima linüktem dang Ukraine nung rara anentsü atema inyaksü ajungshiba den külemi Syria densema azü tokshia raraba tesem ajak nung rara anentsü mepishi.

Francis-isa ita ana tejaklen Syria aser Turkey na nung menoknok lendong ajanga takoksa angurtem atema-a sarasademtsü.

Tawa Israel aser Palestine tsüingda raraba dak sendakba nung Francis-i telok anaprongla dang temelung lemteptsü,

akhümtsübuteptsü aser ken o jembiba ajanga Temeshi yimti (Yirusalem) densema region nung yimjung alitsü atema sarasadem.

"Rara aser sensak tia ajanga jenshirtem linük aikati jenokdaksüba ya teimla aliba temaitsü lir, anungji iba atemaji asenoki pelateptsüla," ta pai ashi.

Easter Sunday anepdang nisung 45,000 shi adenshia liasü saka anüingdang tashi nungbo Pope Francis-i jembiba onük angatsü atema nisung ajak senteper 100,000 shi adenshia liasü.

Tawa Francis anogo asemshi Rome nung aliba hospital ka nung monga liasü aser temang tajungba küma April 1 nü hospital nungi discharge asü.

Easter Sunday nü Pope Francis-i onük talangka jembidang mapang pa terok asepa aser aketa liasü.

Thailand nung apuba China nunger Khristantem US nung jenoker

April 09, 2023: Tawa Thailand nung ketdangsertemi China nunger Khristan telok ka pua liasü; parnok China-i tanaben meyipa yoktsü ta tsübua liasü saka Texas, USA-i ogo.

Texas nung amenoka aliba China Aid telok nungi Pastor Bob Fu-i iba osangji metetdaksü.

Osangbener den jembidang pastor Fu-i, "Iba ya atangji GOOD FRIDAY ka aser China densema alima nung Khristantem atema tasü nungi shia aruba Amongnü (Easter) temoatsü lir. Hopta ka tejaklen Mayflower Arogo nungi züingsemtem apuba sülen CCP [Communist Chinese Party]-i parnok jail nung puoktsü, ta bilema liasü. Ajisüaka tangbo parnok kümzükogo," ta ashi.

Shenzhen Reformed Holy Church dang 'Mayflower Church' taka ajar. Iba Arogo nungi züingsem 63 tashi yaküm

September ita nungi Thailand nung liasü aser parnok visa mapang tembangba ajanga Thailand ketdangsertemi apu. Parnok dang senchi achiba sülen pua Bangkok nung aliba facility kati anir oa liasü.

Shenzhen Holy Reformed Church nungi züingsemtem jagi aser mapang tatsüka South Korea nung aliba sülen Thailand-i arua linük yimtiba, Bangkok nung aliba UN refugee office nung refugee jenjang atema temepishiba agüja liasü.

Pastor, Pan Yongguang leniba nung Khristantemji anogo ishika atsük, iba sülen hotel-i tanaben meyipa ao. Parnok indang passports aser visas yaküm October ita nung 'expire' sür aliba agi Thailand immigration police 20-i parnok apu.

Taküm August ita nungi tenzükba China nunger

Khristantem jagi United States nung jenoka alitsü atema meranga liasü aser tesüsa parnok tebilemba atalokogo.

Khristantemji tain 28 aser tanur 35 lir aser parnok Hokolbar nikonngang Texas (US) tonga ogo.

China nungi Khristantem yariba atema Pastor Fu-i International Religious Freedom Alliance densema International agencies aika dang pelaba lemsatap.

"Iba ya alima linüktemi bendangshidang kecha mesü amalitepa inyakba tatishitsü ka lir. Ni US sorkar agencies densema telok balala ajak dang pelar," ta Pastor Fu-i ashi.

"Iba sayatenya nung shilem agitetba atema pelar. China nung religious freedom mangu tashi onoki meranga inyaksü. Tsüingremi America aser reshikangshiba Arogo moajang," ta pai ashi.

ANOGO ABEN TSÜNGREM DEN

Tuluba dang nangzükba

T. Ken 95:1-7

"Kechiaser Kibubaji Tsüingrem tulu ka lir, aser tsüingrem ajak madak chuba tulu ka lir" (t.3). Ibaji Tenüngsang Ken züluri limapur tsüingremtem repranger tamang tenangzükba akangshia züluba lir.

J.B. Phillips i pa kaket "Nenok Tsüingrem Kanga Tila" nung Tsüingrem uluba akangshia ashi. Ne Tsüingrem tila ka dang süra, ne tamanga tila ka dang; na Tsüingrem tulu ka kara, na tamang tulu ka akatsü- ne tamang tulu nung tamang nung uluba masü saka Tsüingrem tulu nung tamang tulu. Atangji Tsüingremji tulu ka süra Pa uluba koda agizüktsü?

Mezüngbuba, Pa tenüng sangang. "Tenüngsang agi asenoki Pa tsüingdangi odi arung; tenüngsang agi asenoki Pa dangi tepela yokdi arung" (t.2). Pa tenüng sangang kechiaser PAJI TSÜNGREM TULU KA LIR. Pa uluba teyangluba tashi aor. "Tzüyim pa meyong, kechiaser pai aji yanglu; kechiaser pa ket agi ali takongji yanglu" (t.5). Pa ket nung alima tarokdak lir; tenem kolaktemji pa meyong (t.4). Tzüyim tarok aser tenem talang Tsüingrem metettsübaji koda tajung. Kodang asenok tenem kolak nung lidir, Pa yangji lir. Kodang asenok lenden nung lidir, Pa idakji lir. Tzüyim aser ali takong nung aliba Tsüingrem Tulu asoshi tepelatsü. Asenok kong lidir liang idakji asenok Tsüingrem metettsü akok.

Tanabuba, Pa dang ken tenang. "Oh, arung, Kibuba dang asenoki tendi arung; asen tekümtet lung dang asenoki tepela ola yokdi arung" (t.1). Aser Pa külemdi. "O arung, asenoki Pa külemdi aser apudakdi; asen Teyanglur Kibuba madak asenoki apudakdi" (t.6).

Nisung tila dang telangzübaji Tsüingrem ulubaji lir. Kodang nai ne temenenji tulu aser teimla samaba tulu ta ngudir, mesüra kodang nai mekoktettsüsa khuret tulu lidir, Tsüingrem tulu ka nai külemer ta bilemtetang. Nai Pa tsüingdang apudakdang Pa tuluba akümer.

KLBC D Block nung Easter tekülem sentong agi



April 09, 2023 nü Kohima Liangmai Baptist Church nung Easter Sunday tekülem sentong nung Arogo nung Pastor, Rev. N. Silubo Zeliang-i jembidang tangokba noksa nung angur.

Kohima, Rongchii/April 09

(TYO): April 09, 2023 nü Kohima Liangmai Baptist Church D. Block-i Easter Sunday tekülem sentong ayongzükba agiogo, ta Rutmakbo KLBC Media Cell-i sangdong ka ajanga metetdaksü.

Iba sentong nung jembidang pastor, Rev. N. Silubo Zeliang-i, Yisu ya Tsüingrem chir lir; Pai tasü madak takok angu aser yimsüsür, ta ashi.

"Khrista tasü nungi shia aruba ajanga Pa nüburtem temenen nungi kümzükba sayur. Yisu Khrista tasü nungi shia aru aser tanü Pa taküm lir," ta Rev. N. Silubo-i ashi.

"Asenoki Kibuba dak

tamang kara Khrista shia aruba ama asenoka tasü nungi shia arutsü. Yisu Khrista-i taküm tenla agüja Kangki nung asüba ajanga asenok temenen nungi kümzük, aser Pa tasü nungi shia aruba ajanga asenok tatem maka Tsüingrem den tesendaktep alitsü atema tamang agütsür," ta paisa ashi.

Kasa sentong nung KLBC Youth Department-i menenpurtemi Yisu Khrista mezüingmeshiba/atalaba, ajisüaka Pai Tebu Tsüingrem dang parnok atema tatok meshitsüba jilushi saya.

Khrista tasü nungi shia aruba nungtem nung Arogoi Easter benjung chiyung ayongzükba liasü.

AO OSHI ANGAZÜKDAK:

TANÜ ANGAZÜKTSÜBA OJANG



Pokrep

(v) tango agi apua aliba raksa (burst)

* Balloon aika apur ayuba kar pokrep.

Poksa

(v) tanük küma raksa (explode)

* Lenmang yanglurtemi bomb agi lung tulu poksa.

OLONG PAITEP # 6482

Grid for Olong Paitep # 6482 with numbers 1-17 in various positions.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6481 TELANGZÜBA


TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

Agüja aliba noksa nung meputepi aliba 6 bushiang



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



Dhubri Hospital nung ozüing alema azü ayokertem apu



Dhubri, April 9, 2023

(Agencies): Dhubri Police-i April 9 nü Dhubri Medical College and Hospital (DMCH) campus nung azü ayokba maparen ka putetogo.

Mehedi Hasan, Sarfaraz Hussain aser Mominul Hoque nungeri azü yokdokdang apu. The Humanity ta ser

shirangertem yariba teloki par aseme azü ayokba putet aser police ket nung agütsü.

"DMCH campus nung ozüing alema mapa inyakba osang ka onok dang ashi aser iba jagi Dhubri Police den yaritepa tasa ka atong" ta The Humanity founder Sudip Kundu-i ashi.

Par asem yagi unit ka nung Rs 5,000 nungi Rs 6,000 agi ayokdang apu.

"Iba mapa ya mapang talangka inyaka arur. Onoki hospital kecha nunga iba mapa meinyakdaksütsü. Onoki parnok puogo aser iba ama temerenshi angutsü" ta Kundu-isa metetdaksü.

Barpeta Railway station nung PFI & CFI tanishir 3 apu

Barpeta, April 9, 2023

(Agencies): Popular Front of India (PFI) aser Campus Front of India (CFI) tanishir asem tashi Assam police-i puogo.

Honibarnü Barpeta Road Railway station nung parnok apu aser parnok ya PFI tanishir 2 aser CFI tanishir ka lir ta Superintendent of police Amitabh Sinha-i ashi.

Par asem ya Delhi nungi aruba liasü aser Brihostibar aonung railway station nung apu, ta pai ashi.

CFI tanishir ya national treasurer Jahidul Islam aser PFI tanishirtem ya Assam secretary Jakir Hussain aser state president Abu Sama na

lir ta jangjaogo.

Assam police-isa tena ket nung Rs 1.5 lakh aser kulikaket aika puogo ta SP Sinha-isa metetdaksü.

September 2022 nung telungpur telok anaprong noktanga sülen par aseme Assam toktsür jena ao aser tangalen nungi mapa inyaka aru, ta pai ashi.

Islam aser Hussain na ya Baksa district nungi aser Sama ya Barpeta nungi lir.

Yaküm September ita noktanga sülen Assam aser New Delhi nung PFI züingsem 36 tashi puogo.

PFI ya 2014 nungi minority-dominated district

tem nung kanga bulua mapa inyaker. National Register of Citizens nung tenüing züluoktsü atema parnok nübortem kanga yaria aru.

Iba mapa meinyakdang PFI-i Bengali oshi jembir Muslim nunger alidak shisaliok maparen kanga inyaka liasü.

2019 küm Citizenship Amendment Act anema lungkak aidang Assam nung PFI ya nisungtemi meteta aküm.

CFI ya PFI indang kaketshir kongsang lir aser September 2022 nung Centre sorkari CFI aser sendaktepa aliba telok 7 tashi noktanga liasü.

Golaghat nung konger nung miim chisemer nisung 3 asü

Golaghat, April 9, 2023

(Agencies): Assam kübok Golaghat district nung konger nung miim chisemer nisung 3 asü. Tasürtem rongnung arishi küm 2 tanur ka dena liasü.

Iba lendong ya April 2, 2023 nü Merapani nung atalok. Kibong ka nungi nisung 5-i miim aketba kongerji achi, ta police

ketdangsür kati ashi.

"Konger achiba sülen nisung 3 asü. Brihostibarnü Tarali Barman (23) aser Hokolbarnü Prafulla Barman (24) aser Honibar aonung tena jabaso Hemanta Barman (2) asü" ta ketdangsüri ashi.

Par asemprong Jorhat Medical College and Hospital

(JMCH) nung asü.

"Konger nung miim chisemer kibong pungu nungi nisung 13 temang nung timtem adok" ta Merapani Community Health Centre Deputy Superintendent Dr Chandra Shyam-i ashi.

Tanüingba nisungtemjibo temang tajungba kümogo, ta Shyam-i ashi.



Agartala nung North East Car Rally "Purvottar Bharat Parikrama" nung shilem agirtem külemi agiba noksa ka angur. Hokolbarnü Car Rally ya Agartala Military Station tonga aru aser Spear Corps Warriors-i pelashishia agizük. Honibarnü Car Rally nung adenertemi Albert Ekka War Memorial nung tetushi agütsü aser ESMs, Veer Naris o NCC cadets den ajurutepa sensaksem. Iba rally ya Shaheed Diwas amongtsü anogo jakdang March 22, 2023 nü Lieutenant General RP Kalita, General Officer Commanding in Chief, Eastern Command-i Kolkata nung tenzükja liasü.

Saudi Arabia-i Houthi telungpur 13 chiok



Sanaa, Rongchii/April 9 (Agencies): Tepuokertem chioktsü atema nangzüktepba ama Saudi Arabia-i parnoki pua yua aliba Houthi telungpur terana dak tema chiokogo, ta Houthi telok nungi otongdar kati metetdaksü.

Yemen nung küm aika rara-arua aliba tembangdaksütsü atema alima kintemi merangdanga aruba nung shilem ka ama Oman nung ketdangsurtem Yemeni yimtiba Sanaa tonga aoba mapang Honibarnü tepuokertem ya chioka liasü.

Tepuokertem melentepba inyakyim atema shimba Houthi telok nungi Abdul-Qader el-Murtaza-i Twitter ajanga ashiba agi, Houthi telok nungi tepuoker 13 Sanaa tonga aruogo.

Pai ashiba agi, tepuokertem ya Houthi telungpurtemi taoba mapang chioker aliba Saudi nung tepuokertem melena chiokogo. Ajisüaka pai telungpurtem yagi Saudi nung tepuokertem ya kodang chiok iba indang osang tejangja magütsü.

Kasa mapang nung Saudi sorkaria tepuokertem chiokba dak sendakba nung telangzüba kecha magütsü.

"United Nations-i achaayanga tenangzüktepba yangluba nung shilem ka ama tepuokertem ya Saudi tepuokdak nungi chiokogo aser taruba Brehostibarnü

tenangzüktepba ya ajunga benoka inyaksangshitsü," ta al-Murtaza-i ashi.

Taoba mapang Switzerland nung United Nations-i achaayanga tenangzüktepba ka yangluogo, kong tepuoker 887 chioktsü atema nangzüktepba densema lir.

Yemen dangi UN special envoy-i ashiba agi, Yemen nung küm ti tashi rara aruba anendaksütsü atema jenjang balala agia aruba nung iba tenangzüktepba yangluba ya shilem ka lir. Iba rara nung nisung meyirejang aika tepsetogo aser alima nung humanitarian crises tulutiba ka tenzükdakja liasü.

2014 küm Houthi teungpurtemi linük yimtiba Sanaa aser linük anütoktiplen tesem timba ka atsünga alima kintemi agizüker aliba sorkar atsüngtokba sülen Yemen nung mepetmesü tenzüka liasü. Telungpurtemi sorkar atsüngtokba sülen sorkar tenzükertem timba linük anüolentip leni jena ao aser iba sülen Saudi Arabia nung jenoka liasü. Houthi telungpurtemi iba jenjang agiba sülen ita ishika lir sorkar tanaben amenokshidaksütsü atema Saudi-i aniba telok kati telungpurtem ya amak tenzüka liasü.

Yemen nung iba mangatettep ya Saudi Arabia aser Iran na tsünga proxy war ta züngshir.

Yemen nung Houthi Supreme Political Council tekolakba den ajurutepba sensak asemtsü atema Oman aser Saudi nungi ketdangsurtem Yemen yimtiba Sanaa tonga aruba mapang tepuokertem ya chiokogo, ta Houthi meyong news agency Saba-i Deobarnü sangdong ka ajanga metetdaksü.

Houthi chief negotiator Mohammed Abdul Salam shiba Muscat nung amenoka lir pai Honibarnü Twitter ajanga ashiba agi, pa Oman nung ketdangsurtem den külemi Sanaa tonga ogo.

Oman-i joko küm aika Iran-i teyari agütsüba Houthi telungpurtem aser Saudi Arabia na sensaksem achaayanga arudar.

Item sensaksemtem ya UN-i linük nung yimjung asoshi inyakyim balala benoka inyakdangba den külemi aoer aser Saudi Arabia aser Iran na tsünga küm tenet tashi mangatettep adoka aruba tembangdakja tesendaktep yanglushitsü asoshi mulungtepba sülen iba inyakyim ya kanga kara tejkadangi bener odar.

Iran aser Saudi na tesendaktep yanglushitsü ateam mulungtepba osang ya March 10 nü Beijing nung sangdonga liasü aser iba ajanga Yemen nung mangatettep adoker aliba ya bentettsü ta timla agütsür.

China-i Taiwan amaker mesüka military drills agir

Taipei, Rongchii/April 09 (Agencies): Military drills tenzükter ananü buba nung China-i Taiwan nung tongtipang tesemtem amaker ama aser meketa aliba tzüyim nung inyaka liasü.

Iba drills ya taoba hopta Taiwan tiri US semdangba asoshi telangzüba agüja aser tekumdangtsü sayua agir ta Beijing-i ashir.

China mitkar temi iba asetkong lungbangba mesüka inyakdang US-i China dang aremzüksü ajungshi.

Deobarnü asetkong meketa China nung tayimtsü 70 shi yimzua liasü ta Taiwan-i ashir. China nung rong 11 nguogo.

Raradang amshiba tayimtsü 45 agi Taiwan Strait median line - koba agi Taiwan aser China nung litsü-lika sadangtsür - aji alema ao mesüra Taiwan indang air defence identification zone south-western leni ao, ta Taiwan-i Honibarnü shia liasü.

Beijing-i "Joint Sword" nungja agüja aliba operation ya Hombar tashi alitsü. Iba

operation yagi Taiwan nung ketdangsur ain adoker.

Military exercise agitsü atema Tir Tsai-i US semdangba ya tatemtsü ka ama amshir, koba agi region nung tensa kanga mejungi kumdaksür, ta Taipei nung aliba defence ketdangsur temi Honibarnü ashi.

Drill tenzükter mezung anogo China indang rong aika rongnung kati China nung asoshi Taiwan den anasatiba Pingtan asetkong anasa injang khalokja liasü.

SANGDONGER

Süngdong lu ayimer atema agüja aliba Nursery farm nungi süngdong (saplings) peria angutsü.

1. Pine Tree
2. Kisamen (Kokon)
3. Ongpangsülem (Alder) etc

SHIM KI MPSC Nursery Farm

Marepkong Ward Mokochung
9862127345

**LAND
FOR
SALE**

- 1) Behind Sovima Cricket Stadium
Rate Rs. 570/- per Sq.ft.
- 2) Darogajan Colony
5 minutes from Zion Hospital
Rate Rs. 450/- per Sq.ft.
ANY SIZE AVAILABLE
- Price Negotiable -
CONTACT : 7629839960

Israel-ia Syria nung artillery amshia amaker

Jerusalem, Rongchii/April 09 (Agencies): Syria litsü nungi Israel north tsütsü rockets khaliktsüba sülen Israel mitkar temia Syria nung artillery amshia amak, ta Israel mitkar temi ashi, aser tatalokba anaprong nung ki o jen raksatsüba mesüra asü amaba mali.

Israel ya Gaza, Lebanon, occupied East Jerusalem aser occupied West Bank densema tesem aisü nung azüdokshi tali ajurua alidang Deobarnep arütsü alema khatapa liasü.

Syrian sorkar nungi osang kecha sangdonga mali.

Syria nung rocket launchers dak artillery aser drone ka amshia amak, ta Israel mitkari ashi.

Deobarnep Syrian territory nungi rocket round anaben khalokja liasü, ta ashi. Mezüngbuba nung rocket asem dena liasü aser ka Israel-i rakzüka aliba Golan Heights nung alu ka nung tsük.

Tanaben buba nung rocket asem khaloktsü aser iba mapang northern Israel nung siren tsüklok. Asü amaba osang mali. Rocket nungi jana tem ozü litsü nunga tsük saka asü amaba mesüra ki o jen raksaba mali, ta Jordan indang army ajanga ashi.

Rocket tem ya Palestinian Islamic Jihad movement indang armed wing, al-Quds Brigades mapa lir ta tenüng agiogo, ta

Lebanon nung amenoka aliba Al Mayadeen TV ajanga ashi.

Israel police temi Al-Aqsa Mosque compound mita oa Ramadan sarasadem asoshi adenshia aliba Palestine nung tekülemer dak stun grenades aser rubber agi meyibanga aliba steel injang tem khalokja Israel-Palestine tsünga tensa tamajungba kumer lia Syria nungi rocket tem ya khaloktsür.

Jerusalem indang Old City nung aliba tesem ya Muslim aser Jews (Yihuda) nung asoshi temeshi lir, koba dang Temple Mount ta ajar aser yangji Yihuda nung sarasadem mesüdaktsüba mapang talangka nungi raratepa aru.

Muslim nung Ramadan den Yihuda nung Passover aser Christanpur Easter benjong mapang ka nung iba tesem ya mita ao. Yangji tashiyim amshiba ajanga azüdokshi aser Palestine nung temeshi ita, Ramadan amungertem ain adok aser iba yongji Lebanon aser Gaza Strip nung nok-nü bena aliba telok balalai Israel nung rocket khaloktsü tenzük.

Iba yongji Israel mitkar temi Gaza aser southern Lebanon nung Palestine nung Hamas telok aliba tesem balala nung bomb poklokja liasü.

Israel aser occupied Palestinian territories nung tensa tamajungba kumer lia tang region nung iba tensa ya ajurur.

Northern occupied West Bank nung Israel security forces temi Deobarnü Palestine nung arishi küm 20 tain ka khaset, ta Palestinian Health Ministry ajanga ashi.

Qalqilyah anasa Azzun nung arishi küm 20 tain Ahed Salim dak teko aser tepok nung injang khaloktsü, ta ministry ajanga ashi.

Aji masüadang el-Bireg yimti telungi aidak checkpoint ka nung Israeli settlers temi gari tem nung long agi aondang Palestine nung pezü yirua liasü.



April 1 nungi 5 tashi Nagpur nung asayaba 33buba Senior National Sepaktakraw Champions nung Nagaland tetsür Sepaktakraw team-i silver medal 1 aser bronze medal 2 nguogo. Team nung asayar 12 densema liasü kong DGP Sepaktakraw team nungi asayar 4 aser State Sports Girls Academy Dimapur nungi asayar 12 densema liasü.

Haaland ya Messi aser Ronaldoden jenjang kasa nung lir: Pep Guardiola

Southampton, Rongchii/ April 9 (Agencies): Manchester City manager Pep Guardiola-i ashiba agi, striker Erling Haaland ya Lionel Messi aser Cristiano Ronaldo nunger den jenjang kasa nung lir.

Honibarnü Premier League nung Southampton goal 4-1 agi akokba asaya nung Haaland-i goal ana idaktsüba sülen Guardiola-i iba tebilemba ya lemsatepa liasü.

Iba asaya nung Haaland-i mezüngbuba goal tekolak agi tongoktsü aser bicycle kick ka ajanga tanabuba goal idakja liasü. Pai iba season nung tetoktepa ajak nung goal 44 aser Premier League nung goal 30 idaktsür lir.

2002-03 season nung Ruud

van Nistelrooy aser 2017-18 season nung Mohamed Salah-i season ka nung goal 40 idakja Premier League asayartem rongnungi tenati goal timba idaktsür aliba tang Haaland-i menepogo.

Iba asaya nung Erling Haaland-i goal ana idaktsüba densema Manchester City-i goal pezü idakja liasü.

"Asenok küm 20 tashi Cristiano Ronaldo aser Lionel Messi asayaba jangradema reprang arudar ajisüaka pa-tena den kasa jenjang nung lir," ta Guardiola-i Honibarnü BBC dang ashi. Haaland-i tanabuba goal idaktsüba yimya agi Guardiola kanga pua liasü. Jack Grealish-i agütsüba ball ka Haaland-i bicycle kick ka ajanga kanga junga idakja

liasü.

"Anüing nungi ball metsüzüka ai nung ondaktsütsü temela masü. Pa aso kanga tulu anungji iba amala goal idaktsütsüsa senpet aliba ya jangrademtsüka. Iba goal ya khenyongi balaka liasü," ta Guardiola-i ashi.

Arishi küm 22 tain asayar shiba Borussia Dortmund nungi City nung arua aden pai goal pezü dang idaktsüra Premier League season ka nung Alan Shearer aser Andy Cole nati goal (34) timtiba idaktsür aliba meneptsü.

Premier League nung asaya 29 asayaba sülen City puri point 67 nguteta parnok temaba jenjang nung aliba Arsenal team dang nungi point pongu agi tajemba lir.

Priyanshu Rajawat-i Orleans Masters kokogo



Rongchii/April 9, 2023 (Agencies): India nunger asayar Priyanshu Rajawat-i Orleans Masters tebur kija asaya final nung Denmark nunger asayar Magnus Johannesen koka tang mezüngbuba world tour Super 300 title ka benogo.

Asayar ana tsüngda final asaya set asem asaya liasü ajisüaka kanga toktepa asayar tatem nung Rajawat-i 21-15, 19-21, 21-12 agi asaya koka liasü. 2022 küm January ita sülen India nunger tebur asayartem rongnungi tang mezüngbuba Rajawat World tour title ka benogo.

Asayamung tepeyong nung

Rajawat game ka nung dang tamakok ngua liasü.

Madhya Pradesh nungi arishi küm 21 tain asayari pa den asayar Johannesen shiba BWF rankings nung jenjang 49buba nung lir pa minute 68 nung koka liasü.

India nunger asayar yagi hopta tepeyong kanga junga asayaogo aser tatem nung takok ngutetba ya pa atema takok tulu ka lir. Pa 2022 küm Thomas Cup akokba India team nung züngoksemer liasü.

Priyanshu atema iba asaya akokba ya tang tashi nung pa indang career nung takok tulutiba lir. Final nung asayar anapronglai kanga meranga

asaya, ajisüaka tongtibatang mapang nung India nunger asayar yagi point nguteta pai asaya kokogo.

World No 58 asayar ya asayamung tenzüka mapang nung main draw nunga maliasü, ajisüaka sayar teneti iba asayamung nung shilem magitsü atema telemtetba agiba sülen pa main draw-i ai.

Mezüngbuba round nung pai külem India nunger asayar Kiran George straight games nung akokba sülen tanabuba round nung pai Japan nunger world No 12 asayar Kenta Nishimoto koka liasü. Iba ya Rajawat asoshi takok tulu ka liasü kechiyong iba asaya masü tsüngda Nishimoto kanga junga asaya liasü aser pai taoba hopta-ang Madrid nung Spain Masters koker liasü.

Iba sülen quarter final asaya nung pai Chinese Taipei nunger asayar Yu Jen Chi koka semifinals-i ai. Semifinal asaya nung Rajawat-i maneni kanga junga asaya Ireland nunger asayar Nhat Nguyen 21-12, 21-9 agi minute 44buba nung ayong ayonga koka final tongteta liasü.

Rani Rampal India team nung mezüngoksem

Rongchii/April 9, 2023 (Agencies): India tsürtem rongnungi nungtugu hockey asayar aser taoba captain Rani Rampal, Australia den asayatsü aliba asayamung atema Honibarnü sangdongba asayar 33 rongnung densema maliasü.

Hockey India-i, Sports Authority of India centre, Bengaluru nung anogo 35 senior tetsür national camp ka ayongzüka akatsü atema asayartem tenüing sangdonga liasü. Iba camp ya core group "structure" aser "tactics" arangtetshitsü atema ayongzüka lir.

Ajisüaka Hockey India sangdong ajanga Rani kechiba team nung manisem iba indang osang kecha magütsü.

Tetsür team chief coach Janneke Schopman-i ashiba agi, camp ya April 9 nungi May 13 tashi agitsü aser iba sülen Australia den asayatsü aliba ajanga alima nung hockey asaya nung temaba jenjang nung aliba team den toktepa India team-a koba jenjang nung ali aji jangjatsü.

"Taoba camp nung asayartem jurila asaya dak rangloker inyaksangshiogo aser

tangbo team structure aser tactics dak rangloker inyaksangshiner," ta Schopman-i ashiba Hockey India sangdong ka ajanga Honibarnü metetdaktsü.

"Camp tembangba sülen Australia team den Australia nung asayaba ajanga temaba jenjang nung aliba tetsürtem den tokteptsü atema team koba jenjang nung ali aji jangjatsü," ta lai ashi.

Core probables group:

Goalkeepers: Savita, Rajani Etimarpu, Bichu Devi Kharibam, Bansari Solanki

Defenders: Deep Grace Ekka, Gurjit Kaur, Nikki Pradhan, Udita, Ishika Chaudhary, Akshata Abaso Dhekale, Jyoti Chhetri, Mahima Chaudhary

Midfielders: Nisha, Salima Tete, Sushila Chanu Pukhrabam, Jyoti, Navjot Kaur, Monika, Mariana Kujur, Sonika, Neha, Baljeet Kaur, Reena Khokhar, Vaishnavi Phalke, Ajmina Kujur

Forwards: Lalremsiami, Navneet Kaur, Vandana Katariya, Sharmila Devi, Deepika, Sangita Kumari, Mumtaz Khan, Sunelita Toppo.

Taoba India nunger football asayar Menino Figueiredo süogo



asaya liasü.

"Menino Figueiredo asüba osang angazüka temulung koremer. Pa Goa nungi football asaya nung mezüngpur ka liasü aser pai sempet tajung amshia asayaba ajanga national team nung züngoksema liasü. Tsüngremi iba mangyim jashi khuret koktettsü atema par kinungertem nem tashi agüjang ta sarasademtsür," ta AIFF tir Kalyan Chaubey-i ashi.

Rongchii/April 9, 2023 (Agencies): Taoba mapang India nunger football asayar Menino Figueiredo asüba osang angazüka All India Football Federation (AIFF)-i Deobarnü asükhü lemsatepogo.

Figueiredo ya Hokolbar aonung menor asü. Pa arishi küm 86 liasü aser pai jabaso ana aser jala ka toktsür iba lima nungi pilaogo.

Figueiredo asaya aliba mapang defender tajang ka liasü aser pa ya mezüngpur ka liasü. Pa ya Goa nungi India team nungi asayaba mezüngbuba asayar aser Goa team indang mezüngbuba captain liasü. Goa team Santosh Trophy nung 1964 küm mezüngbuba asayaba mapang pa lenisüba nung

AIFF Secretary General Dr Shaji Prabhakaran-i ashiba agi, "1960's mapa India nunger defender tajung kar liasü aser item rongnung Figueiredo-a ka liasü. Pa asüba ajanga India nung football asaya nung tawa ka adokdaktsüogo."

Figueiredo ya 1936 küm October 2 nü aso aser USSR National team-i 1965 küm India semdangba mapang pa India team nung züngoksemer liasü.

Pa Mumbai nung asayaba asaya nung mezüngbuba national team nungi asaya koba linük semdangertemi goal 1-0 agi koka liasü. Domestic football asaya nung pa Goa nung amenoker aliba nungtugu club Salgaocar nungi mapang talangba ka asaya liasü.

BILEMDANGANG

"Maongka agitettsü atema renema liang."